

Iluarsiissut

Matumani saqqummiussissut 8. marts 2017-imeersoq taarserneqarpoq

(Immikkoortoq 15-imi aaqqiisoqarpoq, tamatumani allannguutissatut siunnersuummut atatillugu immikkoortoq nutaaq ilanngunneqassaaq, taannalu atornerluineq pillugu inatsisip aappassaaneerpeqarnerani saqqummiunneqassaaq).

Uunga siunnersuut: Atornerluineq pillugu Inatsisartut inatsisissaat nr. xx, xx 2017-imeersoq

(Peqqissutsimut Naalakkersuisoq)

Saqqummiussissut

(Peqqissutsimut Naalakkersuisoq)

Siullermeerineq

Naalakkersuisut sinnerlugit matumuuna atornerluineq pillugu Inatsisartut inatsisissaattut siunnersuummik saqqummiiniarpunga.

Naalakkersuisut UPA 2014-imi nalunaarusiaq saqqummiuppaat: “Atornerluisunik katsorsaa-neq, pisariaqartitsineq inuiaqatigiinnullu iluaqutitariumaagassai”, tassanilu qitiutinneqarput atornerluinerit malunnarnerusut (imigassamik, hashimik aamma aningaasanoortarnermik). Kingusinnerusukkut nalunaarusiaq atornerluisarnerup aningaasartuutaaneranik misissueqqis-sarnermik ilaneqarpoq.

Nalunaarusiamik eqikkaanermi ersersinneqarpoq nunatsinni aanngaajaarniutini atornerluisarnermik annikillisisinnaasumik aalajangersimaqqissaartumik iliuuseqarneq inuiaqatigiinnut iluaqutaajumaartoq. Tamanna inuiaqatigiit annertuumik iluaqatigiinnassanngilaat, kisianni aamma inuit ataasiakkaat inuuneqqortunerulernermikkut, peqqinnerulernermikkut, atugaris-sarnerulernermikkut kiisalu inuunermi atugarineqartut ajortut ingerlateqqinnginnissaannut periarfissaqalernikkut tamanna iluaqutigissavaat.

Nalunaarusiani inernilerneqarpoq innuttaasuni inersimasut affaasa missaat peqqissutsiminnut ajortumik sunniuteqarsinnaasumik atornerluilersimasut imaluunniit atornerluileriaannaasut. Atornerluineq inuttut ajornartorsiuteqarnermut pissutaallunilu inuttut ajornartorsiuteqarnerup kingunerisinnaavaa.

“Siunissami nuna tamakkerlugu atornerluisunik katsorsaarnermut pilersaarutissatut siunnersuut”-mi UPA 2015-imi saqqummiunneqartumi imigassamik, hashimik aningaasanoorajunner-millu ataatsimoorussamik ilisimatusarnermillu tunngaveqartumik

katsorsartarnissaat allaatigi-neqarpoq. Pilersaarummi pitsaaliuinermit atornerluisunillu katsorsaannermit iliuuserineqartartut nassuiarneqarlutillu atornerluineq pillugu inatsisiliornissamik aallarniinnaq allaatigineqarput.

Nalunaarusiat siunissamilu atornerluisunik katsorsaasarnissamut pilersaarutissatut siunnersuut inatsisissatut siunnersuummi tunngaviupput.

Inatsisissatut siunnersuutip siunertaraa atornerluinermit ajornartorsiutit sapinngisamik siusisukkut suussusersinissaat, atornerluisup atornerluineq pillugu katsorsarneqarnissaanik neqeroorfiginissaa katsorsaanerullu iluaqtissartai attanneqaannassasut.

Atornerluinermit katsorsaaneq inatsisissatut siunnersuummi qitiutinneqarpoq. Inatsisissatut siunnersuummi katsorsaannermit neqeroorutit taakkartorneqarput piffissallu ingerlanerani pisariaqartitat allanngorpata katsorsaannermit allanik neqerooruteqarnissamut periarfissiilluni.

Atornerluinermit katsorsaaneq innuttaasumut ataasiakkaamut akeqassanngilaq. Atornerluisunik katsorsaanerup innuttaasunut akeqannginnissaa 2014-2018 naalackersuisooqatigiinnissamik isumaqatigiissummut ilaavoq 2016-2018 naalackersuisooqatigiinnissamik isumaqatigiissummi ingerlateqqinneqarluni.

Atornerluinermit paasissutissanik katersuivik, Allorfik, aaqqissuussaasumik katsorsaasarfiuvoq. Allorfiup suliassaasa ilaat tassaapput atornerluinermit tunngatillugu iliuuserineqartut ataqatigiissartarnissaat katsorsaariaatsillu ilisimasanut pitsaanerpaanut nutaanerpaanut qaqugukkulluunniit naapertuuttarnissaannik qulakkeerinnineq.

Inatsisissatut siunnersuummi taamatutaaq illoqarfinni katsorsaaviit allaatigineqarput. Katsorsartinnissamut kajumissaarinissaq atornerluisullu katsorsarnissaat suliassaasa ilagaat. Kommunini tamani katsorsaavinnik pilersitsisoqassaaq.

Inatsisissatut siunnersuummi Atornerluinermit inuit pingaaruteqartut, tassa inuit suliffimmini atornerluinermit katsorsartinneq pillugu ilitsersuisartut katsorsartinnissamullu kajumissariisartut, pillugit aalajangersagaqarpoq. Suliffeqarfiup nammineq aalajangissavaa aaqqissuussaq tamanna atorunneqarlugu, taamatutaaq sulisup nammineq aalajangissavaa tassaarusunnerluni atornerluinermit inuk pingaarutilik.

Inatsisissatut siunnersuut atornerluineq pillugu ilisimasanik aaqqissuussaasumik katersinissamut iluaqutaassaaq, taamaalilluni siunissami katsorsaariaatsit suut pitsaanerpaamik sunniuteqartarnersut ilisimaneqalerniassammata tamatumalu kingorna katsorsaannermit neqeroorutit naleqqussarneqarsinnaaniassammata. Inatsisissatut siunnersuut taamaalilluni atornerluineq pillugu ilisimasanik katersuinissamut aalajangersakkanik imaqarpoq.

Suliassaqarfiit akimorlugit suleqatigiinneq pitsaanerpaamik katsorsaannissamut katsorsaanerullu kinguneqarlunissaanik qulakkeerinnissamut pingaarutilittut isigineqarpoq. Taamaattumik inatsisissatut siunnersuut Allorfiup, kommunit peqqinnissaqarfiullu suleqatigiinnissaat pillugu aalajangersakkanik imaqarpoq.

Inatsisissatut siunnersuutip saqqummiunnerata kingorna eqqartuunneqarsimasunik katsorsaanermut tunngatillugu ajornartorsiut Kalaallit Nunaanni Pinerluttunik Isumaginnittoqarfillu eqqartorneqartoq Naalakkersuisut maluginiarsimavaat. Massakkorpiag suli isumaqatigiissuteqartoqanngilaq. Taamaattumik Naalakkersuisut inatsimmik allannguutissatut siunnersuuteqassapput matuma aappassaaneerpeqarnerani: Siunnersuut uunga: Atornerluineq pillugu Inatsisartut Inatsisaat nr. xx xx. 2017-imeersoq. Kalaallit Nunaanni Pinerluttunik Isumaginnittoqarfik innuttaasunik inissiisarfimmiittunik atornerluinermik katsorsaanissamik neqerooruteqartarnissamik kissaateqarpat suleqatigiinnissamik isumaqatigiissuteqartoqarnissaa inatsimmik allannguutissatut siunnersuummi qulakkeerneqassaaq.

Taamatut oqaaseqarlunga Naalakkersuisut sinnerlugit siunnersuut Inatsisartunut suliassanngortippara.